



Gabinete Wever - Croes II

# ISLAONLINE

Noticia di Gobierno

2023

Diahuebs 7 September 2023

Email: IslaOnline@gobierno.aw Tel: 528-4952

**2023**  
**AÑA DI**



**UNION**  
**Y POSITIVISMO!**



@IslaOnline2023





## HULANDA TA ACEPTA PA SIGUI NEGOCIA RIBA PROPOSICION DI GOBIERNO DI ARUBA PA UN SOLUCION HIBRIDE



Diahuebs mainta, den Parlamento a tuma luga e reunion publico na unda cu Gobierno di Aruba a duna un update riba negosacionnan cu ta tumando luga cu Hulanda. Desde e reunion di dia 22 di augustus, Parlamento a indica den ki cuadro nan lo kier pa Gobierno sigui negocia cu Hulanda.

Ya pa e siguiente dia, dia 23 di augustus, Gobierno a cuminsa deliberacionnan cu e ekiponan di e profesionalnan y despues tambe a cuminsa delibera riba nivel di gobierno pa gobierno. Gobierno di Aruba a haci un proposicion pa yega na un acuerdo riba liñanan grandi. Den e acuerdo aki, Gobierno a propone pa traha cu un solucion hibride, un Rijkswet, Ley di Reino, cu ta regla algun aspecto y un Landsverordening, un ley local, cu ta regla algun aspecto. Den esaki a laga Parlamento cu tur su autoridad y su autonomia. “Esaki ta loke cu Parlamento a indica tambe y esaki nos a ofrece na Hulanda”, Prome Minister a remarca.

Prome Minister a duna di conoce cu den e acuerdo aki, Gobierno a pone e condicionnan cu Parlamento a indica cu lo kier den un negosacion asina. Gobierno, diaranson 6 di september, a haya un contesta for di Hulanda riba e propuesta aki na unda cu Hulanda a indica di ta dispuesto pa sigui papia riba e tema di solucion hibride. Deleberacionnan riba esaki lo continua den e temponan nos dilanti pa propone kico ta bay den un Ley di Reino y kico ta bay den un Ley Local.



Mirando cu dia 10 di october proximo e debenan ta bay madura, ta preparando e documentonan pa fianza riba interes halto di mercado pa paga bek den 20 aña pero cu un clausula cu por tuma den consideracion cu si Gobierno di Aruba yega na un entendimiento di gobierno pa gobierno prome cu fin di aña, lo ta dispuesto pa baha e interes ainda.

“Nos por bisa cu e prome paso ta tuma na unda cu Hulanda a acepta pa habri conbersacionnan riba e solucion hibride cu Gobierno di Aruba a propone. Esaki ta un desaroyo positivo. Pa esaki, Gobierno di Aruba a haya te cu fin di aña 2023 pa yega na un acuerdo. Gabinete Wever-Croes ta sigui na mesa cu Hulanda cu e mesun determinacion y cu hopi positivismo pa yega na solucion den beneficio di Pais Aruba”, Prome Minister a enfatisa.

Den e reunion den Parlamento, Prome Minister a duna e resumen aki y a trece tur documentacion pa pone nan ter inzage. Parlamentarionan asina por wak y lesa tur e cartanan aki. “Akinan tin transparencia, no tin nada di sconde y lo no sconde nada tampoco pasobra ta hunto nos mester yega na e miho solucion pa nos pueblo, sperando cu Parlamento duna Gobierno e sosten pa sigui negocia cu Hulanda pa yega na e miho areglo den beneficio pa henter pueblo di Aruba”, Prome Minister Evelyn Wever-Croes a duna di conoce.



# **Prome Minister Evelyn Wever-Croes: Muchanan y maestronan sumamente contento MATERIALNAN DIGITAL CU MARIA GORETTI SCHOOL A GANA CU E PROYECTO DI EDUTECH, A WORDO INSTALA**



Diahuebs mainta, Prome Minister Evelyn Wever-Croes, compaña pa Presidente di Parlamento Edgard Vrolijk, y Parlamentario Darlaine Guedez-Erasmus, a bishita Maria Goretti School en conexion cu e proyecto di Edutech. Maria Goretti School a gana pa e klasnan 5, borchinan digital, tablets pa e muchanan por haya les riba dje, y laptops pa tur e docentenan di scol. E materialnan aki a wordo instala y finalisa durante vakantie, y awe Prome Minister a bishita e scol pa por admira e bunita proyecto aki.

Prome Minister a expresa di ta sumamente orguyoso di e proyecto di Edutech, cu ta un proyecto di innovacion cu Gobierno ta sostene. E entusiasmo, cu e maestronan ta trahando cu ne, e felicidad di e muchanan pa por wordo educa di e forma aki, y e progreso cu ta wordo treci den e scolnan a traves di e proyecto aki, ta algo cu sigur ta yena e prome mandatario cu emocion tambe.

"Mi kier a gradici cabesante di scol Juffrouw Mirla Tromp pa a participa y kere den e proyecto aki. Juffrouw Mirla pa hopi tempo caba tin ideanan innovativo pa sigui dilanti, pero ta stap pa stap por ehecuta nan, y e ta haciendo esaki di un bunita manera pa Maria Goretti School. Tambe, mi kier a felicita e scol en general, tur docente, alumno, mayornan y specialmente Edutech pa haci esaki posibel," Prome Minister a expresa.

Na su turno, Juffrouw Mirla Tromp, a gradici Edutech pa bin cu e proyecto di innovacion aki, na unda ta duna e scolnan e oportunidad di por gana materialnan digital pa nan scol. Tambe el a gradici Gobierno di Aruba pa e sosten brinda na e proyecto aki, y pa pone prioridad na enseñansa, pasobra sin e sosten di nan, e facilidad pa yega na materialnan digital aki, no ta uno facil.







## MINISTER ARENDS TA CONFIRMA CU TRAHADONAN DI SABA TA RICIBI RECHTTREKKING E AÑA AKI

No tin duda cu actualmente tin un cuenta habri cu e trahadonan di SABA y segun Minister Arends esaki lo wordo paga e aña aki. Esey ta locual e mandatario encarga cu Asuntonan di Adulto Mayor a confirma den Parlamento di Aruba dialuna, durante tratamiento di e presupuesto supletorio 2023.

Pa hopi aña tin un disputa entre e tres partidonan, esta Gobierno, gerencia di SABA y trahadonan di SABA. Den pasado Gobierno a haci compromiso di lo paga e trahadonan di SABA un suma cu awe ta yega na aproximadamente 3 miyon florin. Esaki pa un asina yama "rechttrekking". Gobierno por comproba cu e fondonan a wordo traspasa pa e doño di trabou, esta gerencia di SABA pa nan por paga e trahadonan. Pero gerencia di su banda ta bisa cu nunca a ricibi e fondonan ey. Mientrastanto e trahadonan a keda dal den bashi.

Durante tratamiento di presupuesto e fraccion di AVP a pidi pa Gobierno di Aruba pasa 3 miyon florin un biaha mas, indicando cu no ta necesario investiga kico a bay robes e prome biaha. Minister Arends a splica cu esaki no ta un forma responsabel pa anda cu fondonan publico. E manera corecto pa atende cu esaki ta pa apunta partidonan independiente y laga nan confirma kico exacto a pasa cu e fondonan cu Gobierno a manda. Unabes tin claridad, por splica Parlamento ta unda e fondonan publico a bay. No menos cu tres departamento di Gobierno a confirma cu e placa a sali for di caha di Gobierno. P'esey a laga haci un stukkenonderzoek independiente y for di eynan a bira necesario instala un werkgroep independiente.

E werkgroep tambe a conclui cu mester un doorlichting di e administratie di SABA.

Minister Arends a indica cu e investigacion lo wordo haci di tur forma, aunke Parlamentario Wyatt Ras (AVP) den defensa di gerencia di SABA no ta mira necesidad pa investiga nada.

"Un werkgroep ful independiente tambe a yega na e conclusion cu mester un investigacion (doorlichting) y nan a bin cu advies pa nos haci esey. Esaki ta un paso necesario pa duna claridad den e asunto", segun Minister Arends a splica. Sin doorlichting e disputa lo keda un bay-bin entre Gobierno di Aruba y gerencia di e fundacion.



Minister Arends a bisa cu tur colega ministernan ta na altura cu Gobierno tin un cuenta habri, pero no cu SABA, sino cu e trahadonan di SABA. Tur minister sa tambe cu unabes tin claridad Gobierno mester cumpli cu e trahadonan. Na prome luga lo purba yega na e fondonan cu tin den presupuesto, pero si esey no ta posibel Minister Arends lo pidi Parlamento aproba fondo adicional. "Si esey ta e caso mi lo conta cu e ora ey tambe lo tin sosten di Parlamento completo pa por yega na e fondonan aki pa e trahadonan, pasobra ta nan derecho esaki ta."

Ta di lamenta cu oposicion, cu excepcion di fraccion di MAS y Parlamentario Independiente Sr. Rycond Santos do Nascimento, a usa lenguahe inflamatorio durante e reunion di parlamento pa instiga trahadonan, bisando cu Gobierno kier "castiga" nan. Crea panico y rabia no ta yuda resolve e asunto. Tambe ta un lastima e forma con e mesun grupo den oposicion awe ta existi pa Gobierno pasa mas fondonan publico, sin cu tin ningun tipo di claridad riba kico a sosode cu e placa cu ya a bay. E tendencia pa malgastamento no a cambia.

"Te awor aki no tin claridad, y si tin mester di fondo adicional, mi no por tira algo pa Parlamento y pidi Parlamento aproba sin base," Minister Arends a bisa, indicando cu e la anuncia caba cu e lo bin Parlamento pa fondonan adicional si ta necesario. Pa e trahadonan e asunto mester keda resolvi e aña aki.



# Informacion di Participante

Number y Fam: \_\_\_\_\_  
Fecha di Nacemento: \_\_\_\_\_ Edad: \_\_\_\_\_  
Scol: \_\_\_\_\_ Klas: \_\_\_\_\_  
Number di Telefon di Mayor: \_\_\_\_\_



Un number faborito pa bo cacho: \_\_\_\_\_

## Bo Kier Participa?

1. Participacion ta gratis! Tur muchanan di scol basico por participa (1e - 6e klas)
2. Si bo no a ricibi e formulario na scol, bo por download e formulario via: [specialprojectsaruba.org](https://specialprojectsaruba.org)
3. Tarea 1: Duna bo cacho un number  
Tarea 2: Pinta un (of mas) cacho den cura
4. Bo pintura mester ta uno original y creativo, e pintura mester ilustra un cacho den cura y bo por incorpora mas di e puntonan di e Ley di Cacho den dje
5. E pintura mester ta den color y mester ta pinta door di e mucha mes
6. Un (l) pintura pa cada participante; entrega bo formulario no mas tarda cu dia 22 di september 2023 na Bestuurskantoor Oranjestad, na HBK San Nicolas, of na e MFA mas cerca dibo
7. E ganadornan di cada klas lo wordo anuncia dia 4 di oktober 2023 Dierendag riba e pagina facebook di Gabinete Wever-Croes
8. Lo tin un regalito pa tur e ganadornan cu lo wordo entrega fin di oktober



Area pa pinta ↓

Area pa pinta ↓





**E di 17 edicion ta un exito un biaha mas**  
**MINISTER MADURO TABATA PRESENTE**  
**NA E APERTURA DI E EXPOSICION**  
**'E LENS DI MI WOWO'**

**E aña aki dedica na cuatro baluarte y nos planta nacional Telearuba**



Riba Dia di Prensa, Minister Xiomara Maduro di Cultura a atende e di 17 edicion di e exposicion di sr. Leo Vrolijk 'E Lens di mi Wowo' na Biblioteca Nacional Aruba.

'E Lens di mi wowo' ta un exposicion fotografico di diferente miembro di Prensa y fotografonan cu ta apasiona cu e arte di fotografia, cu ta scoge pa expone algun potret pa conta e storia di e hendenan di nos Pais.

Durante e anochi aki sr. Leo Vrolijk a reconoce cuatro baluarte di Prensa, sr. Albino Tromp, trahando casi 50 aña na Telearuba,



sr. Richard Lacle di e medio di comunicacion AWE24, sr. Hilario Doncker cu recientemente a baha cu pensioen y sr. Cornel Djaoen cu tin 26 aña trahando e mundo di television. Telearuba tambe a haya un reconocimiento special en conexion cu su 60 aniversario.

Minister Maduro ta gradici sr. Leo Vrolijk pa su dedicacion di ya caba 19 aña pa trece fotografonan hunto pa asina nan por comparti cu Pueblo local nan lensnan ta mira. E invitacion ta wordo extendi pa pasa na Biblioteca Nacional Aruba y admira e exposicion bunita aki.



Continuacion POTRETNAN DI EXPOSICION 'E LENS DI MI WOWO'....







## LEY DI KINDEROPVANG TA NA VIGOR DESPUES DI UN TRAYECTORIA LARGO



Durante conferencia di prensa di Gobierno di Aruba, Minister di Husticia y Asuntonan Social sr. Rocco Tjon, hunto cu colega sra. Sue-Ann Ras, a anuncia cu e ley di kinderopvang, pues e ley di centronan di cuida di mucha, a bay na vigor. Esaki ta un paso sumamente importante den sigui eleva y garantiza e seguridad y calidad di cuida pa nos muchanan. Un trayecto bastante largo, cu a inicia na aña 1998, y awe na 2023 a logra finalisa esaki bou di e maneho di Gabinete Wever-Croes.

Ta trata di un trayectoria hopi extenso y ademas compleho, cu a conta cu sosten di varios instancia y profesionalnan clave. Principalmente, sra. Sue-Ann ras, cu desde un principio a cana e caminda pa por yega na concretisa e ley di kinderopvang. Remarkabel ta cu, danki na e colaboracion entre Departamento di Mucha y Hoben (DMH), y tur e sessionnan como tambe boletinann informativo pa mantene e centronan di cuida bon informa, a logra cu awe tin mas cu ochenta centronan di cuida, cu ta oficialmente registra den e registro.

Ta asina cu, DMH a wordo finalisa na aña 2022, prome cu e ley aki a bin na vigor, cual ta importante, mirando cu un di nan tareanan lo ta e supervision di e ehecucion di e Ley aki. Ademas di esaki, nan ta encarga cu e parti di registro, como tambe administra y maneha esaki. Adicionalmente, lo encarga e parti di e guia, yudansa, preparacion y evaluacion pa practicamente tur e aspectonan cu ta toca e centronan di cuida di mucha, como tambe conseha y sostene cada centro di cuida di mucha, pa loke ta rekisitonan pa yega na e permiso aki.

E ley aki ta mara na e rekisitonan di calidad cu cada centro di cuida mester tene cuenta cune, manera e partinan di seguridad, pedagogico, higiena como tambe e desaroyo personal, di henter e personal cu ta traha den e diferente centronan di cuida.

Un danki grandi na colega minister sr. Glenbert Croes cu a inicia esaki den cuadro di e sociaal crisisplan, sra. Sue-Ann Ras, Departamento di Mucha y Hoben cual ta conta cu un grupo chikito pero sigur capacita y dedica, conhunto eCodigo di Proteccion, y Directie Wetgeving cu tawata tin un rol sumamente importante pa nos por a yega na e dia di awe y asina finalisa e trayecto cu a inicia na 1998.






Por ultimo, ta manda un apelacion na tur e centronan di cuida cu no a registra ainda, pa haci esaki, a traves di e website di Departamento di Mucha y Hoben, pa asina por bin na remarke pa haya permiso, mirando cu e permisonan cu ta mara na e ley lo bay wordo otorga e aña aki ainda, na tur e centronan di cuida cu ta registra.




Continuacion LEY DI KINDEROPVANG TA NA VIGOR....





Departamento  
di Mucha y Hoben



CALIDAD DI E CENTRO DI CUIDO DI MUCHA



Den colaboracion cu diferente otro departamento di Gobierno:  
• Dienst Technische Inspectie  
• Brandweer  
• Directie Volksgezondheid  
• Fundacion Pa Nos Muchanan



HANDHAVING/EHECUCION



- Bestuurlijke handhaving  
- last onder dwangsom  
- bestuurlijke boete
- Bijzondere bevoegdheden  
- schriftelijke aanwijzing
- Strafrechtelijke handhaving  
- geldboete

OVERIGE-, OVERGANGS- EN SLOTBEPALING



Conform art. 41 van de Landsverordening Kinderopvang (AB 2017 no. 38), brengt de minister binnen vijf jaar na de inwerkingtreding van deze landsverordening, en vervolgens telkens na vijf jaar, aan de Staten een verslag uit over de doeltreffendheid en de effecten van deze landsverordening in praktijk.

Masha danki



Departamento di Mucha y Hoben





## SR. WILLIAM NG A ELABORA RIBA E TRABOU DI QUICK ELECTRICAL SERVICES NA E BMX TRACK PARKE CURAZON JABURIBARI



Durante Conferencia di Prensa di Gobierno di Aruba, representante di Quick Electrical Services N.V. Sr. William NG a elabora riba e trabou cu nan a realisa na e BMX Track na Parke Curazon. E trabou tabata encera instalacion di coriente pa e poste di luznan.

Quick Electrical Services a diseña e instalacion completo y e necesidadnan cu tabatin pa e luznan por a cende. Na final a haci e “set up” pa e luznan por ilumina manera debe ser riba e pista. Pa resumi, e prome fase tabata e trabou di “engineering” unda mester a diseña, calcula y ehecuta. Despues a haci e test final pa wak si tur cos ta traha debidamente.



**Minister Endy Croes:**

# **A CENDE LUZ NA E BMX TRACK NA PARKE CURAZON JABURIBARI**

**Copa Latino Americano BMX ta tuma luga dia 9 y 10 di september na BMX Track na Jaburibari**



Diaranson anochi, durante Conferencia di Prensa di Gobierno di Aruba a tuma luga cendemento di luz di e BMX Track na Parke Curason, Jaburibari. Den e ultimo simannan trabounan duro a tuma luga pa por ilumina e pista di BMX Track pa campeonato internacional Copa Latino Americano BMX. Copa Latino Americano BMX ta organisa pa Aruba Wieler Bond y BMX. E torneo ta tuma luga dia 9 y 10 di september na Aruba, unda un total di 12 pais y alrededor di 200 coredo ta participa den diferente categoria.

En conexion cu esaki a instala un total di 6 poste di luz nobo y luznan LED pa e pista di BMX Track na Jaburibari. Presente tambe na ceremonia aki tabata Parlamentario Ricky Hoek cu a felicita Minister Endy Croes, Gabinete Wever – Croes II y tur stakeholder cu a haci nan empeño pa realisa e proyecto aki pa nos deportistanan di BMX. Esaki sigur ta ilustra un trabou di ekipo entre Gabinete Wever – Croes II, Fundacion Facilidatnan Deportivo (FFD), Fundacion Lotto pa Deporte, Elmar N.V., Quick Electrical N.V., Timeline Services, Aruba Wieler Bond (AWB), BMX, ATA, Ministerio di Deporte y mayornan cu a traha hunto pa por a logra realisa e bunita proyecto aki pa nos hobennan. Rondona pa e hobennan cu tabata den training, Minister Endy Croes a cende e luznan di BMX Track.

Por a presencia e entusiasmo y alegria di e hobennan pa mira nan parke di BMX keda ilumina. Mester agrega cu e representantenan di COPAB a elogia iluminacion di e pista. Awo e hobennan tin un facilidad unda cu nan por practica e deporte di BMX te den oranan laat di anochi. Por ultimo, Minister Endy Croes ta desea tur nos atletanan local cu ta competiendo e fin di siman aki hopi exito. Cu deseo, disciplina, dedicacion y determinacion boso ta logra.





**Minister Endy Croes:**


# ORGANISACION INTERNACIONAL DI BMX TA DEN PREPARACION PA E COMPETENCIA DI COPA LATINOAMERICANA DI BMX NA ARUBA



Diaranson anochi, e organisacion internacional tabata presente na Parke Curazon Jaburibari pa e ceremonia di cendemento di luz pa e pista di BMX. Sra. Moniek Leerdam, kende ta miembro di directiva di Aruba Wieler Bond a expresa cu ta hopi contento cu e iluminacion di Parke Curazon Jaburibari. Despues di 13 aña Aruba lo tin un careda internacional atrobe. Competencia di Copa Latinoamericana di BMX lo tuma lugar na e pista di Parke Curazon Jaburibari, dia 9 y 10 di september binidero. Sra. Leerdam ta gradici Minister Endy Croes cu a haci e campeonato aki un realidad na Aruba. Ta sperando mas di 100 atleta cu ta eherce e deporte di BMX durante e fin di siman aki.

Ademas di esaki, Sra. Leerdam a indica cu Aruba tambe ta forma parti di Confederacion Latino Americana de BMX (COPAB). COPAB ta un organisacion di BMX cu ta organisa e Campeonato di Copa Latinoamericana di BMX pa e paisnan cu ta forma parti di Las Americas. Tambe, dos otro colega cu ta forma parti di e directiva di COPAB a bin di exterior pa yuda den e preparacion di e competencia, esta Sra. Lina Lucas de Catoigui y Sr. Gustavo Matos de Laparra. Sra. Lucas de Catoigui a expresa cu e ta hopi contento di ta aki na Aruba y a indica cu un di e soñonan di COPAB ta pa integra BMX Americano den Caribe. Sra. Lucas de Catoigui ta expresa cu e ta masha agredido cu Gobierno di Aruba a contribui pa realisa e competencia aki na Aruba. Esaki ta e punto inicial pa e deporte di BMX crece den Caribe.

Sra. Lucas de Catoigui ta expresa cu e deporte di BMX ta un deporte atractivo y saludabel pa e hobennan. Muchanan cu ta practica deporte tin un estilo di bida diferente y pa e motibo aki mester keda sostene y inverti den deporte. Sr. Gustavo Matos de Laparra, kende ta miembro di COPAB y presidente



di Fundacion di Ciclismo na Peru tabata presente. Sr. Matos de Laparra ta forma parti di e campeonato di Copa Latino Americano di BMX cu ta tuma lugar e fin di siman aki na Aruba y a indica cu e ta hopi contento di loke el a presencia na e BMX Track na Jaburibari. Recien Aruba a cuminsa desaroya e disciplina di BMX, pero a cuminsa den un bon forma. Sr. Matos de Laparra a expresa cu e pista ta bunita y sigur esaki ta incentiva e hobennan y e disciplina di BMX. Sigur door di a pone coriente y luznan nobo, ta brinda e hobennan mas oportunidad pa practica e deporte di BMX te den oranan laat di anochi. Sr. Matos de Laparra a agrega cu e desaroyo aki sigur lo laga e disciplina di BMX crece na Aruba. COPAB ta haci e tipo di competencianan aki na varios pais y ta encarga pa "set up" e pista y laga tur cos cla pa e competencia. Ademas di esaki, COPAB ta comparti nan experticio y experiencia cu e organisacion. E meta di COPAB ta pa laga un legado unda tur pais por sigui crece y desaroya den e deporte di BMX. Pueblo di Aruba ta keda cordialmente invita pa apoya nos deportistanan di BMX, dia 9 y 10 di september bindero na e pista di BMX di Parke Curazon Jaburibari.





## MINISTER GLENBERT CROES A BISHITA STR AGRICULTURE FARM NA ALTO VISTA



Recientemente Minister Glenbert Croes riba invitacion di STR Farm a bishita e facilidadnan di e compania aki situa na Alto Vista. E mandatario a expresa di a keda impresiona cu e facilidad di agricultura aki.

Un facilidad cu ta produci ya desde su establecimiento diferente fruta y berduranan pa consumo y mercado local.

E producto final cu STR Agriculture ta ofrece ta pasa un proceso riguroso di cuido, escogiendo e miho simiyanan pa plantacion, un proceso cuidadoso y balansa di awa, luz y nutrientenan cu na final ta bira fruta y berduranan saludabel pa su consumo.

E mandatario a expresa su gratitud y apoyo na tur Agricultor/ Cunukero di Aruba. Un sector cu tin tur potencial pa bira un industria primaria importante pa Aruba, cu por cierto ta hayando apoyo di diferente Ministerio di Gabinete Wever Croes 2. Den caso di Glenbert Croes, como Minister di Labor, ta pa fomenta

e cuponan di trabou cu e sector aki ta creando. Como Minister di Enseñansa pa Empleo, gestiona e iniciativa pa hunto cu STR Agriculture, crea curso cu lo stimula e formacion necesario pa por traha den agricultura. Ta hopi experticio ta wordo treci cu e inversion di STR Agriculture Farm, cu na su turno ta wordo traspasa pa nos yiunan di tera. Pero como e Minister encarga cu WEB y ELMAR, tambe nos ta apoyando cunukero- y agricultornan cu tarifa special di awa y coriente cu e proposito pa apoya e sector aki cu tarifa special pa finalmente yega e consumidor tambe na un tarifa special.

“Nos ta agradecido na señor Joe Ramadar pa a deposita su confianza den Aruba, pa su inversion den Aruba y nos lo traha schouder cu schouder cu ne pa un dado momento nos weita nos yiunan di tera tambe bira activo den e sector di Cria, Pesca y Agricultura, pa hunto promove y stimula e industria primario aki.”, e mandatario a expresa.



Union ta importante pa cualkier sociedad pasobra e ta e base di forsa, poder, guia, curashi y desaroyo. Union ta provee un fuente constante di motivacion positivo y e ta e vinculo pa logronan grandi. Esey ta loke Aruba a demostra, den union y cu positivismo a logra recuperacion despues di varios crisis tras di otro.



2023

AÑA DI UNION Y POSITIVISMO! \_\_\_\_\_